

# **Medea**

Lucius Annaeus Seneca minor

## Dramatis Personae

Medea  
nutrix  
Creo  
Iason  
nuntius  
chorus Corinthiorum

personae mutae:

Medeae et Iasonis filii  
Creontis comites  
Furiae  
umbra Absyrti Medeae fratris  
armiferi

Scaena Corinthi

Actus Primus

[Ara pro Mediae et Iasonis domo, Medea orans.]

Medea:  
di coniugales tuque genialis tori,  
Lucina, custos quaeque domituram freta  
Tiphyn novam frenare docuisti ratem,  
et tu, profundi saeve dominator maris,  
clarumque Titan dividens orbi diem,  
tacitisque praebens conscientia sacris iubar  
Hecate triformis, quosque iuravit mihi  
deos Iason, quosque Medeae magis  
fas est precari: noctis aeternae chaos,  
aversa superis regna manesque impios  
dominumque regni tristis et dominam fide  
meliore raptam, voce non fausta precor.  
nunc, nunc adeste sceleris ultrices deae,  
crinem solutis squalidae serpentibus,  
atram cruentis manibus amplexae facem,  
adeste, thalamis horridae quondam meis  
quales stetistis: coniugi letum novae  
letumque socero et regiae stirpi date.  
mihi peius aliquid, quod precer sponso manet:  
vivat. per urbes erret ignotas egens

exul pavens invisus incerti laris,  
iam notus hospes limen alienum expetat,  
me coniugem optet quoque non aliud queam  
peius precari, liberos similes patri  
similesque matri - parta iam, parta ultio est:  
peperi. querelas verbaque in cassum sero?  
non ibo in hostes? manibus excutiam faces  
caeloque lucem - spectat hoc nostri sator  
Sol generis, et spectatur, et curru insidens  
per solita puri spatia decurrit poli?  
non redit in ortus et remetitur diem?  
da, da per auras curribus patriis vehi,  
committe habenas, genitor, et flagrantibus  
ignifera loris tribue moderari iuga:  
gemino Corinthos litori opponens moras  
cremata flammis maria committat duo.  
hoc restat unum, pronubam thalamo feram  
ut ipsa pinum postque sacrificas preces  
caedam dicatis victimas altaribus.  
per viscera ipsa quaere suppicio viam,  
si vivis, anime, si quid antiqui tibi  
remanet vigoris; pelle femineos metus  
et inhospitalem Caucasum mente indue.  
quodcumque vidit Pontus aut Phasis nefas,  
videbit Isthmos. effera ignota horrida,  
tremenda caelo pariter ac terris mala  
mens intus agitat: vulnera et caedem et vagum  
funus per artus - levia memoravi nimis:  
haec virgo feci; gravior exurgat dolor:  
maiora iam me scelera post partus decent.  
accingere ira teque in exitium para  
furore toto. paria narrentur tua  
repudia thalamis: quo virum linques modo?  
hoc quo secuta es. rumpe iam segnes moras:  
quae scelere parta est, scelere linquenda est domus.

[abit.]

Chorus Primus

[Chorus Corinthiorum in orchestra choream dans]

Chorus:

ad regum thalamos numine prospero  
qui caelum superi quiique regunt fretum  
adsint cum populis rite faventibus.  
primum sceptriferis colla Tonantibus  
taurus celsa ferat tergore candido;  
Lucinam nivei femina corporis

intemptata iugo placet, et asperi  
Martis sanguineas quae cohibet manus,  
quae dat belligeris foedera gentibus  
et cornu retinet divite copiam,  
donetur tenera mitior hostia.

et tu, qui facibus legitimis ades,  
noctem discutiens auspice dextera  
huc incede gradu marcidus ebrio,  
praecingens roseo tempora vinculo.  
et tu quae, gemini praevia temporis,  
tarde, stella, redis semper amantibus:  
te matres, avide te cupiunt nurus  
quamprimum radios spargere lucidos.  
vincit virgineus decor  
longe Cecropias nurus,  
et quas Taygeti iugis  
exercet iuvenum modo  
muris quod caret oppidum,  
et quas Aonius latex  
Alpheosque sacer lavat.

si forma velit aspici,  
cedent Aesonio duci  
proles fulminis improbi  
aptat qui iuga tigribus,  
nec non, qui tripodas movet,  
frater virginis asperae,  
cedet Castore cum suo  
Pollux caestibus aptior.  
sic, sic, caelicolae, precor,  
vincat femina coniuges,  
vir longe superet viros.

haec cum femineo constitit in choro,  
unius facies praenitet omnibus.  
sic cum sole perit sidereus decor,  
et densi latitant Pleiadum greges,  
cum Phoebe solidum lumine non suo  
orbem circuitis cornibus alligat.  
ostro sic niveus puniceo color  
perfusus rubuit, sic nitidum iubar  
pastor luce nova roscidus aspicit.  
ereptus thalamis Phasidis horridi,  
effrenae solitus pectora coniugis  
invita trepidus prendere dextera,  
felix Aeoliam corripe virginem  
nunc primum saceris, sponse, volentibus.  
concesso, iuvenes, ludite iurgio,  
hinc illinc, iuvenes, mittite carmina:  
rara est in dominos iusta licentia.

candida thysigeri proles generosa Lyaei,  
multifidam iam tempus erat succendere pinum:  
excute sollemnem digitis marcentibus ignem.  
festa dicax fundat convicia fescenninus,  
solvat turba iocos - tacitis eat illa tenebris,  
si qua peregrino nubit furtiva marito.

## Actus Secundus

### Scaena I.

[Medea, nutrix pro domo.]

Medea:

occidimus: aures pepulit hymenaeus meas.  
vix ipsa tantum, vix adhuc credo malum.  
hoc facere Iason potuit, erepto patre  
patria atque regno sedibus solam exteris  
deserere durus? merita contempsit mea  
qui scelere flamas viderat vinci et mare?  
adeone credit omne consumptum nefas?  
incerta vaecors mente non vaesana feror  
partes in omnes; unde me ulcisci queam?  
utinam esset illi frater! est coniunx: in hanc  
ferrum exigatur. hoc meis satis est malis?  
si quod Pelasgae, si quod urbes barbarae  
novere facinus quod tuae ignorent manus,  
nunc est parandum. scelera te hortentur tua  
et cuncta redeant: inclitum regni decus  
raptum et nefandae virginis parvus comes  
divisus ense, funus ingestum patri  
sparsumque ponto corpus et Peliae senis  
decocta aeno membra: funestum impie  
quam saepe fudi sanguinem nullum scelus  
irata feci: saevit infelix amor.  
quid tamen Iason potuit, alieni arbitri  
iurisque factus? debuit ferro obvium  
offerre pectus - melius, a melius, dolor  
furiose, loquere. si potest, vivat meus,  
ut fuit, Iason; si minus, vivat tamen  
memorque nostri muneri parcat meo.  
culpa est Creontis tota, qui sceptro impotens  
coniugia solvit quique genetricem abstrahit  
natis et arto pignore astrictam fidem  
dirimit: petatur, solus hic poenas luat,  
quas debet. alto cinere cumulabo domum;

videbit atrum verticem flammis agi  
Malea longas navibus flectens moras.

Nutrix:

sile, obsecro, questusque secreto abditos  
manda dolori. gravia quisquis vulnera  
patiente et aequo mutus animo pertulit,  
referre potuit: ira quae tegitur nocet;  
professa perdunt odia vindictae locum.

Medea:

levis est dolor qui capere consilium potest  
et clepere sese: magna non latitant mala.  
libet ire contra.

Nutrix:

siste furialem impetum,  
alumna: vix te tacita defendit quies.

Medea:

Fortuna fortis metuit, ignavos premit.

Nutrix:

tunc est probanda, si locum virtus habet.

Medea:

numquam potest non esse virtuti locus.

Nutrix:

spes nulla rebus monstrat adflictis viam.

Medea:

qui nil potest sperare, desperet nihil.

Nutrix:

abiere Colchi, coniugis nulla est fides  
nihilque superest opibus e tantis tibi.

Medea:

Medea superest, hic mare et terras vides  
ferrumque et ignes et deos et fulmina.

Nutrix:

rex est timendus.

Medea:

rex meus fuerat pater.

'

Nutrix:  
non metuis arma?

Medea:  
sint licet terra edita.

Nutrix:  
moriere.

Medea:  
cupio.

Nutrix:  
profuge.

Medea:  
paenituit fugae.

Nutrix:  
Medea -

Medea:  
fiam.

Nutrix:  
mater es.

Medea:  
cui sim vides.

Nutrix:  
profugere dubitas?

Medea:  
fugiam, at ulciscar prius.

Nutrix:  
vindex sequetur.

Medea:  
forsan inveniam moras.

Nutrix:  
compesce verba, parce iam, demens, minis  
animosque minue: tempori aptari decet.

Medea:  
Fortuna opes auferre, non animum potest.  
sed cuius ictu regius cardo strepit?

ipse est Pelasgo tumidus imperio Creo.

Scaena II.

[Creo cum comitibus, Medea, Nutrix]

Creo:

Medea, Colchi noxium Aeetae genus,  
nondum meis exportat e regnis pedem?  
molitur aliquid: nota fraus, nota est manus.  
cui parcer illa quemve securum sinet?  
abolere propere pessimam ferro luem  
equidem parabam: precibus evicit gener.  
concessa vita est, liberet fines metu  
abeatque tuta. fert gradum contra ferox  
minaxque nostros proprius affatus petit.  
arcete, famuli, tactu et accessu procul,  
iubete sileat. regium imperium pati  
aliquando discat. vade veloci via  
monstrumque saevum horribile iam dudum avehe.

Medea:

quod crimen aut quae culpa multatur fuga?

Creo:

quae causa pellat, innocens mulier rogat.

Medea:

si iudicas, cognosce, si regnas, iube.

Creo:

aequum atque iniquum regis imperium feras.

Medea:

iniqua numquam regna perpetuo manent.

Creo:

i, querere Colchis.

Medea:

redeo: qui avexit, ferat.

Creo:

vox constituto sera decreto venit.

Medea:

qui statuit aliquid parte inaudita altera,  
aequum licet statuerit, haud aequus fuit.

Creo:

auditus a te Pelia supplicium tulit?  
sed fare, causae detur egregiae locus.

Medea:

difficile quam sit animum ab ira flectere  
iam concitatum quamque regale hoc putet  
sceptris superbas quisquis admovit manus,  
qua coepit ire, regia didici mea.  
quamvis enim sim clade miseranda obruta,  
expulsa supplex sola deserta, undique  
afficta, quondam nobili fulsi patre  
avoque clarum Sole deduxi genus.  
quodcumque placidis flexibus Phasis rigat  
Pontusque quidquid Scythicus a tergo videt.  
palustribus qua maria dulcescunt aquis,  
armata peltis quidquid exterret cohors  
inclusa ripis vidua Thermodontiis,  
hoc omne noster genitor imperio regit.  
generosa, felix, decore regali potens  
fulsi: petebant tunc meos thalamos proci,  
qui nunc petuntur. rapida fortuna ac levis  
praecepsque regno eripuit, exilio dedit.  
confide regnis, cum levis magnas opes  
huc ferat et illuc casus - hoc reges habent  
magnificum et ingens, nulla quod rapiat dies:  
prodesse miseris, supplices fido lare  
protegere. solum hoc Colchico regno extuli,  
decus illud ingens Graeciae et florem inclitum,  
praesidia Achivae gentis et prolem deum  
servasse memet. munus est Orpheus meum,  
qui saxa cantu mulcet et silvas trahit,  
geminique munus Castor et Pollux meum est  
satique Borea quique trans Pontum quoque  
summota Lynceus lumine immisso videt,  
omnesque Minya: nam ducum taceo ducem,  
pro quo nihil debetur: hunc nulli imputo;  
vobis revexi ceteros, unum mihi.  
incesse nunc et cuncta flagitia ingere.  
fatebor: obici crimen hoc solum potest,  
Argo reversa. virginis placeat pudor  
paterque placeat: tota cum ducibus ruet  
Pelasga tellus, hic tuus primum gener  
tauri ferocis ore flammanti occidet.  
Fortuna causam quae volet nostram premat,  
non paenitet servasse tot regum decus.  
quodcumque culpa praemium ex omni tuli,  
hoc est penes te. si placet, damna ream;  
sed redde crimen. sum nocens, fateor, Creo;  
talem sciebas esse, cum genua attigi

fidemque supplex praesidis dextra peti;  
iterum miseriis angulum et sedem rogo  
latebrasque viles: urbe si pelli placet,  
detur remotus aliquis in regnis locus.

Creo:

non esse me qui sceptrum violentus geram  
nec qui superbo miserias calcem pede,  
testatus equidem videor haud clare parum  
generum exulem legendo et afflictum et gravi  
terrore pavidum, quippe quem poenae expedit  
letoque Acastus regna Thessalica optinens.  
senio trementem debili atque aevo gravem  
patrem peremptum queritur et caesi senis  
discissa membra, cum dolo captae tuo  
piae sorores impium auderent nefas.  
potest Iason, si tuam causam amoves,  
suam tueri: nullus innocuum crux  
contaminavit, afuit ferro manus  
proculque vestro purus a coetu stetit.  
tu, tu malorum machinatrix facinorum,  
feminae cui nequitia, ad audendum omnia  
robur virile est, nulla famae memoria,  
egredere, purga regna, letales simul  
tecum aufer herbas, libera cives metu,  
alia sedens tellure sollicita deos.

Medea:

profugere cogis? redde fugienti ratem  
vel redde comitem - fugere cur solam iubes?  
non sola veni. bella si metuis pati,  
utrumque regno pelle. cur sontes duos  
distinguis? illi Pelia, non nobis iacet;  
fugam, rapinas adice, desertum patrem  
lacerumque fratrem, quidquid etiam nunc novas  
docet maritus coniuges, non est meum:  
totiens nocens sum facta, sed numquam mihi.

Creo:

iam exisse decuit. quid seris fando moras?

Medea:

supplex recedens illud extremum precor,  
ne culpa natos matris insontes trahat.

Creo:

vade: hos paterno ut genitor excipiam sinu.

Medea:

per ego auspicatos regii thalami toros,  
per spes futuras perque regnorum status,  
Fortuna varia dubia quos agitat vice,  
precor, brevem largire fugienti moram,  
dum extrema natis mater infigo oscula,  
fortasse moriens.

Creo:

fraudibus tempus petis.

Medea:

quae fraus timeri tempore exiguo potest?

Creo:

nullum ad nocendum tempus angustum est malis.

Medea:

parumne miserae temporis lacrimis negas?

Creo:

etsi repugnat precibus infixus timor,  
unus parando dabitur exilio dies.

Medea:

nimis est, recidas aliquid ex isto licet:  
et ipsa propero.

Creo:

capite supplicium lues,  
clarum priusquam Phoebus attollat diem  
nisi cedis Isthmo. sacra me thalami vocant,  
vocat precari festus Hymenaeo dies.

[abeunt.]

Chorus secundus

[Chorus Corinthiorum in orchestra choream dans]

Chorus:

audax nimium qui freta primus  
rate tam fragili perfida rupit  
terrasque suas post terga videns  
animam levibus credidit auris,  
dubioque secans aequora cursu  
potuit tenui fidere ligno  
inter vitae mortisque vias  
nimium gracili limite ducto.

nondum quisquam sidera norat,  
stellisque, quibus pingitur aether  
non erat usus, nondum pluvias  
Hyadas poterat vitare ratis,  
non Oleniae lumina caprae,  
nec quae sequitur flectitque senex  
Arcada tardus plaustra Bootes,  
nondum Boreas, nondum Zephyrus  
nomen habebant.

ausus Tiphys pandere vasto  
carbasa ponto legesque novas  
scribere ventis: nunc lina sinu  
tendere toto, nunc prolato  
pede transversos captare notos,  
nunc antemnas medio tutas  
ponere malo, nunc in summo  
religare loco, cum iam totos  
avidus nimium navita flatus  
optat et alto rubicunda tremunt  
sipara velo.

candida nostri saecula patres  
videre procul fraude remota.  
sua quisque piger litora tangens  
patrioque senex factus in arvo,  
parvo dives, nisi quas tulerat  
natale solum non norat opes.  
bene dissaepti foedera mundi  
traxit in unum Thessala pinus  
iussitque pati verbera pontum  
partemque metus fieri nostri  
mare sepositum.

dedit illa graves improba poenas  
per tam longos ducta timores,  
cum duo montes, claustra profundi,  
hinc atque illinc subito impulsu  
velut aetherio gemitent sonitu,  
spargeret arces nubesque ipsas  
mare deprenum.

palluit audax Tiphys et omnes  
labente manu misit habenas,  
Orpheus tacuit torpente lyra  
ipsaque vocem perdidit Argo.  
quid cum Siculi virgo Pelori,  
rabidos utero succincta canes,  
omnes pariter solvit hiatus?  
quis non totos horruit artus  
totiens uno latrante malo?  
quid cum Ausonium dirae pestes  
voce canora mare mulcerent,

cum Pieria resonans cithara  
Thracius Orpheus solitam cantu  
retinere rates paene coegit  
Sirena sequi? quod fuit huius  
pretium cursus? aurea pellis  
maiusque mari Medea malum,  
merces prima digna carina.  
nunc iam cessit pontus et omnes  
patitur leges: non Palladia  
compacta manu regum referens  
inclita remos quaeritur Argo -  
quaelibet altum cumba pererrat;  
terminus omnis motus et urbes  
muros terra posuere nova,  
nil qua fuerat sede reliquit  
pervius orbis:  
Indus gelidum potat Araxen,  
Albin Persae Rhenumque bibunt -  
venient annis saecula seris,  
quibus Oceanus vincula rerum  
laxet et ingens pateat tellus  
Tethysque novos detegat orbes  
nec sit terris ultima Thule.

### Actus Tertius

#### Scaena I.

[Nutrix, Medea pro palatio.]

Nutrix:  
alumna, celerem quo rapis tectis pedem?  
resiste et iras comprime ac retine impetum.  
incerta qualis entheos gressus tulit  
cum iam recepto maenas insanit deo  
Pindi nivalis vertice aut Nysae iugis,  
talism recursat huc et huc motu effero,  
furoris ore signa lymphati gerens.  
flammata facies, spiritum ex alto citat,  
proclamat, oculos uberi fletu rigat,  
renidet: omnis specimen affectus capit.  
haeret: minatur aestuat queritur gemit.  
quo pondus animi verget? ubi ponet minas?  
ubi se iste fluctus franget? exundat furor.  
non facile secum versat aut medium scelus;  
se vincet: irae novimus veteris notas.  
magnum aliquid instat, efferum immane impium:

vultum Furoris cerno. di fallant metum!

Medea:

si quaeris odio, misera, quem statuas modum:  
imitare amorem. regias egone ut faces  
inulta patiar? segnis hic ibit dies,  
tanto petitus ambitu, tanto datus?  
dum terra caelum media libratum feret  
nitidusque certas mundus evolvet vices  
numerusque harenis derit et solem dies,  
noctem sequentur astra, dum siccas polus  
versabit Arctos, flumina in pontum cadent,  
numquam meus cessabit in poenas furor  
crescitque semper - quae ferarum immanitas,  
quae Scylla, quae Charybdis Ausonium mare  
Siculumque sorbens quaeve anhelantem premens  
Titana tantis Aetna fervebit minis?  
non rapidus amnis, non procellosum mare  
Pontusve coro saevus aut vis ignium  
adiuta flatu possit imitari impetum  
irasque nostras: sternam et evertam omnia.  
timuit Creontem ac bella Thessalici ducis?  
amor timere neminem verus potest.  
sed cesserit coactus et dederit manus:  
adire certe et coniugem extremo alloqui  
sermone potuit - hoc quoque extimuit ferox;  
laxare certe tempus immitis fugae  
genero licebat - liberis unus dies  
datus est duobus. non queror tempus breve:  
multum patebit. faciet hic faciet dies  
quod nullus umquam taceat - invadam deos  
et cuncta quatiam.

Nutrix:

recipe turbatum malis,  
era, pectus, animum mitiga.

Medea:

sola est quies,  
mecum ruina cuncta si video obruta:  
mecum omnia abeant. trahere, cum pereas, libet.

Nutrix:

quam multa sint timenda, si perstas, vide:  
nemo potentes aggredi tutus potest.

Scaena II.

[Iason, Medea nutrix]

Iason:

o dura fata semper et sortem asperam,  
cum saevit et cum parcit ex aequo malam!  
remedia quotiens invenit nobis deus  
periculis peiora: si vellem fidem  
praestare meritis coniugis, leto fuit  
caput offerendum; si mori nolle, fide  
misero carendum. non timor vicit fidem,  
sed trepida pietas: quippe sequeretur necem  
proles parentum. sancta si caelum incolis  
Iustitia, numen invoco ac testor tuum:  
nati patrem vicere. quin ipsam quoque,  
etsi ferox est corde nec patiens iugi,  
consulere natis malle quam thalamis reor.  
constituit animus precibus iratam aggredi.  
atque ecce, viso memet exiluit, furit,  
fert odia prae se: totus in vultu est dolor.

Medea:

fugimus, Iason, fugimus - hoc non est novum,  
mutare sedes; causa fugiendi nova est:  
pro te solebam fugere. discedo, exeo,  
penatibus profugere quam cogis tuis.  
at quo remittis? Phasin et Colchos petam  
patriumque regnum quaeque fraternus crux  
perfudit arva? quas peti terras iubes?  
quae maria monstras? pontici fauces freti  
per quas revexi nobilem regum manum  
adulterum secuta per Symplegadas?  
parvamne Iolcon, Thessala an Tempe petam?  
quascumque aperui tibi vias, clausi mihi -  
quo me remittis? exuli exilium imperas  
nec das. eatur. regius iussit gener:  
nihil recuso. dira supplicia ingere:  
merui. cruentis paucicem poenis premat  
regalis ira, vinculis oneret manus  
clausamque saxo noctis aeternae obruat:  
minora meritis patiar - ingratum caput,  
revolvat animus igneus tauri halitus  
interque saevos gentis indomitae metus  
armifero in arvo flammeum Aeetae pecus,  
hostisque subiti tela, cum iussu meo  
terrigena miles mutua caede occidit;  
adice expedita spolia Phrixei arietis  
somnoque iussum lumina ignoto dare  
insomne monstrum, traditum fratrem neci  
et scelere in uno non semel factum scelus,  
ausasque natas fraude deceptas mea

secare membra non revicturi senis:  
per spes tuorum liberum et certum larem,  
per victa monstra, per manus, pro te quibus  
numquam pepercisti, perque praeteritos metus,  
per caelum et undas, coniugi testes mei,  
miserere, redde supplici felix vicem.  
aliena quaerens regna, deserui mea:

483

ex opibus illis, quas procul raptas Scythae  
usque a perustis Indiae populis agunt,  
quas quia referta vix domus gaza capit,  
ornamus auro nemora, nil exul tuli  
nisi fratris artus: hos quoque impendi tibi;  
tibi patria cessit, tibi pater, frater, pudor -  
hac dote nupsi. redde fugienti sua.

Iason:

perimere cum te vellet infestus Creo,  
lacrimis meis evictus exilium dedit.

Medea:

poenam putabam: munus ut video est fuga.

Iason:

dum licet abire, profuge teque hinc eripe:  
gravis ira regum est semper.

Medea:

hoc suades mihi,  
praestas Creusae: paelicem invisam amoves.

Iason:

Medea amores obicit?

Medea:

et caedem et dolos.

Iason:

obicere tandem quod potes crimen mihi?

Medea:

quodcumque feci.

Iason:

restat hoc unum insuper,  
tuis ut etiam sceleribus fiam nocens.

Medea:

tua illa, tua sunt illa: cui prodest scelus,

is fecit - omnes coniugem infamem arguant,  
solus tuere, solus insontem voca:  
tibi innocens sit quisquis est pro te nocens.

Iason:  
ingrata vita est cuius acceptae pudet.

Medea:  
retinenda non est cuius acceptae pudet.

Iason:  
quin potius ira concitum pectus doma,  
placare natis.

Medea:  
abdico eiuro abnuo -  
meis Creusa liberis fratres dabit?

Iason:  
regina natis exulum, afflictis potens.

Medea:  
non veniat umquam tam malus miseris dies,  
qui prole foeda misceat prolem inclitam,  
Phoebi nepotes Sisyphi nepotibus.

Iason:  
quid, misera, meque teque in exitium trahis?  
abscede, quaeso.

Medea:  
supplicem audivit Creo.

Iason:  
quid facere possim, loquere.

Medea:  
pro me vel scelus.

Iason:  
hinc rex et illinc -

Medea:  
est et his maior metus:  
Medea. nos +configere+. certemus sine,  
sit pretium Iason.

Iason:  
cedo defessus malis.

et ipsa casus saepe iam expertos time.

Medea:

Fortuna semper omnis infra me stetit.

Iason:

Acastus instat.

Medea:

propior est hostis Creo:  
utrumque profuge. non ut in socerum manus  
armes nec ut te caede cognata inquines  
Medea cogit: innocens mecum fuge.

Iason:

et quis resistet, gemina si bella ingruant,  
Creo atque Acastus arma si iungant sua?

Medea:

his adice Colchos, adice et Aeeten ducem,  
Scytha Pelasgis iunge: demersos dabo.

Iason:

alta extimesco sceptrta.

Medea:

ne cupias vide.

Iason:

suspecta ne sint, longa colloquia amputa.

Medea:

nunc summe toto Iuppiter caelo tona,  
intende dextram, vindices flamas para  
omnemque ruptis nubibus mundum quate.  
nec diligentia tela librentur manu  
vel me vel istum: quisquis e nobis cadet  
nocens peribit, non potest in nos tuum  
errare fulmen.

Iason:

sana meditari incipe  
et placida fare. si quod ex socii domo  
potest fugam levare solamen, pete.

Medea:

contemnere animus regias, ut scis, opes  
potest soletque; liberos tantum fugae  
habere comites liceat, in quorum sinu

lacrimas profundam. te novi nati manent.

Iason:

parere precibus cupere me fateor tuis;  
pietas vetat: namque istud ut possim pati,  
non ipse memet cogat et rex et sacer.  
haec causa vitae est, hoc perusti pectoris  
curis levamen. spiritu citius queam  
carere, membris, luce.

Medea:

sic natos amat?  
bene est, tenetur, vulneri patuit locus.  
suprema certe liceat abeuntem loqui  
mandata, liceat ultimum amplexum dare:  
gratum est. et illud voce iam extrema peto,  
ne, si qua noster dubius effudit dolor,  
maneant in animo verba: melioris tibi  
memoria nostri sedeat; haec irae data  
oblitterentur.

Iason:

omnia ex animo expuli  
precorque et ipse, fervidam ut mentem regas  
placideque tractes: miserias lenit quies.

[Iason abit.]

Scaena III.

[Medea, nutrix.]

Medea:

discessit. itane est? vadis oblitus mei  
et tot meorum facinorum? excidimus tibi?  
numquam excidemus. hoc age, omnis advoca  
vires et artes. fructus est scelerum tibi  
nullum scelus putare. vix fraudi est locus:  
timemur. hac aggredere, qua nemo potest  
quicquam timere. perge, nunc aude, incipe  
quidquid potest Medea, quidquid non potest.  
tu, fida nutrix, socia maeroris mei  
variique casus, misera consilia adiuva.  
est palla nobis, munus aetherium, domus  
decusque regni, pignus Aeetae datum  
a Sole generis, est et auro textili  
monile fulgens quodque gemmarum nitor  
distinguit aurum, quo solent cingi comae.  
haec nostra nati dona nubenti ferant,

sed ante diris inlita ac tincta artibus.  
vocetur Hecate. sacra letifica appara:  
statuantur arae, flamma iam tectis sonet.

Chorus tertius

[Chorus Corinthiorum in orchestra choream dans]

Chorus:

nulla vis flammae tumidive venti  
tanta, nec teli metuenda torti,  
quanta cum coniunx viduata taedis  
ardet et odit;  
non ubi hibernos nebulosus imbræ  
Auster advexit properatque torrens  
Hister et iunctos vetat esse pontes  
ac vagus errat;  
non ubi impellit Rhodanus profundum,  
aut ubi in rivos nivibus solutis  
sole iam forti medioque vere  
tabuit Haemus.  
caecus est ignis stimulatus ira  
nec regi curat patiturve frenos  
aut timet mortem: cupit ire in ipsos  
obvius enses.  
parcite, o divi, veniam precamur,  
vivat ut tutus mare qui subegit.  
sed furit vinci dominus profundi  
regna secunda.  
ausus aeternos agitare currus  
immemor metae iuvenis paternæ  
quos polo sparsit furiosus ignes  
ipse recepit.  
constitit nulli via nota magno:  
vade qua tutum populo priori,  
rumpe nec sacro violente sancta  
foedera mundi.  
quisquis audacis tetigit carinae  
nobiles remos nemorisque sacri  
Pelion densa spoliavit umbra,  
quisquis intravit scopulos vagantes  
et tot emensus pelagi labores  
barbara funem religavit ora  
raptor externi redditurus auri,  
exitu diro temerata ponti  
iura piavit.  
exigit poenas mare provocatum:  
Tiphys in primis, domitor profundi,  
liquit indocto regimen magistro;

litore externo, procul a paternis  
occidens regnis tumuloque vili  
tectus ignotas iacet inter umbras.  
aulis amissi memor inde regis  
portibus lentis retinet carinas  
stare querentes.

ille vocali genitus Camena,  
cuius ad chordas modulante plectro  
restitit torrens, siluere venti,  
cum suo cantu volucris relicto  
adfuicit tota comitante silva,  
Thracios sparsus iacuit per agros,  
at caput tristi fluitavit Hebro:  
contigit notam Styga Tartarumque,  
non redditurus.

stravit Alcides Aquilone natos,  
patre Neptuno genitum necavit  
sumere innumeratas solitum figuratas:  
ipse post terrae pelagique pacem,  
post feri Ditis patefacta regna  
vivus ardenti recubans in Oeta  
praebuit saevis sua membra flammis  
tabe consumptus gemini cruoris,  
munere nuptae.

stravit Ancaeum violentus ictu  
saetiger; fratrem, Meleagre, matris  
impius mactas morerisque dextra  
matris iratae: meruere cuncti  
morte quod crimen tener expiavit  
Herculi magno puer inrepertus,  
raptus, heu, tutas puer inter undas.  
ite nunc, fortes, perarate pontum  
fonte timendo.

Idmonem, quamvis bene fata nosset,  
condidit serpens Libycis harenis;  
omnibus verax, sibi falsus uni  
concidit Mopsus caruitque Thebis.  
ille si vere cecinit futura,  
exul errabit Thetidis maritus;  
igne fallaci nociturus Argis  
Nauplius praeceps cadet in profundum;

fulmine et ponto moriens Oileus  
[pro suo proles] patrioque pendet  
crimine poenas.  
coniugis fatum redimens Pheraei  
uxor impendes animam marito.  
ipse qui praedam spoliumque iussit  
aureum prima revehi carina

ustus accenso Pelias aeno  
arsit angustas vagus inter undas.  
iam satis, divi, mare vindicastis:  
parcite iusso.

#### Actus Quartus

##### Scaena I.

[Nutrix pro palatio, chorus.]

Nutrix:

pavet animus, horret: magna pernicies adest.  
immane quantum augescit et semet dolor  
accendit ipse vimque praeteritam integrat.  
vidi furentem saepe et aggressam deos,  
caelum trahentem: maius his, maius parat  
Medea monstrum. namque ut attonito gradu  
evasit et penetrale funestum attigit,  
totas opes effundit et quidquid diu  
etiam ipsa timuit promit atque omnem explicat  
turbam malorum, arcana secreta abdita,  
et triste laeva +comparans+ sacrum manu  
pestes vocat quascumque ferventis creat  
harena Libyae quasque perpetua nive  
Taurus coerces frigore Arctoo rigens,  
et omne monstrum. tracta magicis cantibus  
squamifera latebris turba desertis adest.  
hic saeva serpens corpus immensum trahit  
trifidamque linguam exertat et quaerit quibus  
mortifera veniat: carmine auditio stupet  
tumidumque nodis corpus aggestis plicat  
cogitque in orbes. ,parva sunté inquit ,mala  
et vile telum est, ima quod tellus creat:  
caelo petam venena. iam iam tempus est  
aliquid movere fraude vulgari altius.  
huc ille vasti more torrentis iacens  
descendat anguis, cuius immensos duae,  
maior minorque, sentiunt nodos ferae  
(maior Pelasgis apta, Sidoniis minor),  
pressasque tandem solvat Ophiuchus manus  
virusque fundat; adsit ad cantus meos  
lacessere ausus gemina Python numina,  
et Hydra et omnis redeat Herculea manu  
succisa serpens, caede se reparans sua.  
tu quoque relictis pervigil Colchis ades,  
sopite primum cantibus, serpens, meis.é  
postquam evocavit omne serpentum genus,

congerit in unum frugis infaustae mala:  
quaecumque generat invius saxis Eryx,  
quae fert opertis hieme perpetua iugis  
sparsus crux Caucasus Promethei,  
et quis sagittas divites Arabes linunt  
pharetraque pugnax Medus aut Parthi leves,  
aut quos sub axe frigido sucos legunt  
lucis Suebae nobiles Hyrcaniis;  
quodcumque tellus vere nidifico creat  
aut rigida cum iam bruma decussit decus  
nemorum et nivali cuncta constrinxit gelu,  
quodcumque gramen flore mortifero viret,  
dirusque tortis sucus in radicibus  
causas nocendi gignit, attractat manu.  
Haemonius illas contulit pestes Athos,  
has Pindus ingens, illa Pangaei iugis  
teneram cruenta falce depositum comam;  
has aluit altum gurgitem Tigris premens,  
Danuvius illas, has per arentes plagas  
tepidis Hydaspes gemmifer currere aquis,  
nomenque terris qui dedit Baetis suis  
Hesperia pulsans maria languenti vado.  
haec passa ferrum est, dum parat Phoebus diem,  
illius alta nocte succisus frutex;  
at huius ungue secta cantato seges.  
mortifera carpit grama ac serpentium  
saniem exanimat miscetque et obscenas aves  
maestique cor bubonis et raucae strigis  
exsecta vivae viscera. haec scelerum artifex  
discreta ponit: his rapax vis ignium,  
his gelida pigri frigoris glacies inest.  
addit venenis verba non illis minus  
metuenda. sonuit ecce vesano gradu  
canitque. mundus vocibus primis tremit.

Scaena II.

[Ara pro domo, Medea sacrificans, nutrix.]

Medea:

comprecor vulgus silentum vosque ferales deos  
et Chaos caecum atque opacam Ditis umbrosi domum,  
Tartari ripis +ligatos+ squalidae Mortis specus.  
supplicis, animae, remissis currite ad thalamos novos:  
rota resistat membra torquens, tangat Ixion humum,  
Tantalus securus undas hauriat Pirenidas,  
gravior uni poena sedeat coniugis socero mei:  
lubricus per saxa retro Sisyphum solvat lapis.  
vos quoque, urnis quas foratis inritus ludit labor,

Danaides, coite: vestras hic dies quaerit manus. -  
nunc meis vocata sacris, noctium sidus, veni  
pessimos induita vultus, fronte non una minax.  
tibi more gentis vinculo solvens comam  
secreta nudo nemora lustravi pede  
et evocavi nubibus siccis aquas  
egique ad imum maria, et Oceanus graves  
interius undas aestibus victis dedit;  
pariterque mundus lege confusa aetheris  
et solem et astra vidit et vetitum mare  
tetigistis, ursae. temporum flexi vices:  
aestiva tellus horruit cantu meo,  
coacta messem vidit hibernam Ceres;  
violenta Phasis vertit in fontem vada  
et Hister, in tot ora divisus, truces  
compressit undas omnibus ripis piger.  
sonuere fluctus, tumuit insanum mare  
tacente vento; nemoris antiqui domus  
amisit umbras vocis imperio meae.  
die reducto; Phoebus in medio stetit,  
Hyadesque nostris cantibus motae labant:  
adesse sacris tempus est, Phoebe, tuis.  
tibi haec cruenta serta texuntur manu,  
novena quae serpens ligat,  
tibi haec Typhoeus membra quae discors tulit,  
qui regna concussit Iovis.  
vectoris istic perfidi sanguis inest,  
quem Nessus expirans dedit.  
Oetaeus isto cinere defecit rogus,  
qui virus Herculeum bibit.  
piae sororis, impiae matris, facem  
ultricis Althaeae vides.  
reliquit istas invio plumas specu  
Harpyia, dum Zeten fugit.  
his adice pinnas sauciae Stymphalidos  
Lernaea passae spicula.  
sonuistis, arae, tripodas agnosco meos  
favente commotos dea.  
video Triviae currus agiles,  
non quos pleno lucida vultu  
pernox agitat, sed quos facie  
lurida maesta, cum Thessalicis  
vexata minis caelum freno  
propiore legit. sic face tristem  
pallida lucem funde per auras,  
horrore novo terre populos  
inque auxilium, Dictynna, tuum  
pretiosa sonent aera Corinthi.  
tibi sanguineo caespite sacrum

sollemnē damus, tibi de medio  
rapta sepulcro fax nocturnos  
sustulit ignes, tibi mota caput  
flexa voces cervice dedi,  
tibi funereo de more iacens  
passos cingit vitta capillos,  
tibi iactatur tristis Stygia  
ramus ab unda, tibi nudato  
pectore maenas sacro feriam  
bracchia cultro. manet noster  
sanguis ad aras: assuesce, manus,  
stringere ferrum carosque pati  
posse cruores - sacrum laticem  
percussa dedi.  
quodsi nimium saepe vocari  
quereris votis, ignosce, precor:  
causa vocandi, Persei, tuos  
saepius arcus una atque eadem est semper, Iason.  
tu nunc vestes tinge Creusae,  
quas cum primum sumpserit, imas  
urat serpens flamma medullas.  
ignis fulvo clusus in auro  
latet obscurus, quem mihi caeli  
qui furta luit viscere feto  
dedit et docuit condere vires  
arte, Prometheus; dedit et tenui  
sulphure tectos Mulciber ignes,  
et vivacis fulgura flammae  
de cognato Phaethonte tuli.  
habeo mediae dona Chimaerae,  
habeo flammas usto tauri  
guttura raptas, quas permixto  
felle Medusae tacitum iussi  
servare malum.  
adde venenis stimulos, Hecate,  
donisque meis semina flammae  
condita serva: fallant visus  
tactusque ferant, meet in pectus  
venasque calor, stillent artus  
ossaque fument vincatque suas  
flagrante coma nova nupta faces.  
vota tenentur: ter latratus  
audax Hecate dedit et sacros  
edidit ignes face luctifera.

[ad nutricem:]  
peracta vis est omnis: huc natos voca,  
pretiosa per quos dona nubenti feram.

[nutrix abit.]

Scaena III.

[Medea, nutrix, filii Medeae.]

Medea:

ite, ite, nati, matris infaustae genus,  
placate vobis munere et multa prece  
dominam ac novercam. vadite et celeres domum  
referte gressus, ultimo amplexu ut fruar.

[nutrix et filii abeunt.]

Chorus quartus

[Chorus Corinthiorum Medeam observans.]

Chorus:

quonam cruenta maenas  
praeceps amore saevo  
rapitur? quod impotenti  
facinus parat furore?  
vultus citatus ira  
riget et caput feroci  
quatiens superba motu  
regi minatur ultro.  
quis credat exulem?  
flagrant genae rubentes,  
pallor fugat ruborem.  
nullum vagante forma  
servat diu colorem.  
huc fert pedes et illuc,  
ut tigris orba natis  
cursu furente lustrat  
Gangeticum nemus.  
frenare nescit iras  
Medea, non amores;  
nunc ira amorque causam  
iunxere: quid sequetur?  
quando efferet Pelasgis  
nefanda Colchis arvis  
gressum metuque solvet  
regnum simulque reges?  
nunc, Phoebe, mitte currus  
nullo morante loro,  
nox condat alma lucem,  
merget diem timendum  
dux noctis Hesperus.

Actus Quintus

Scaena I.

[Nuntius, Chorus, Medea.]

Nuntius:  
periere cuncta, concidit regni status;  
nata atque genitor cinere permixto iacent.

Chorus:  
qua fraude capti?

Nuntius:  
qua solent reges capi:  
donis.

Chorus:  
in illis esse quis potuit dolus?

Nuntius:  
et ipse miror vixque iam facto malo  
potuisse fieri credo.

Chorus:  
quis cladis modus?

Nuntius:  
vidus per omnem regiae partem furit  
ut iussus ignis: iam domus tota occidit,  
urbi timetur.

Chorus:  
unda flamas opprimat.

Nuntius:  
et hoc in ista clade mirandum accidit:  
alit unda flamas, quoque prohibetur magis,  
magis ardet ignis: ipsa praesidia occupat.

[Nuntius abit.]

Scaena II.

[Nutrix, Medea, filii.]

Nutrix:

effer citatum sede Pelopea gradum,  
Medea, praeceps quaslibet terras pete.

[Nutrix abit.]

Medea:

egone ut recedam? si profugissem prius,  
ad hoc redirem. nuptias specto novas.  
quid, anime, cessas? sequere felicem impetum.  
pars ultionis ista, qua gaudes, quota est?  
amas adhuc, furiose, si satis est tibi  
caelebs Iason. quaere poenarum genus  
haut usitatum iamque sic temet para:  
fas omne cedat, abeat expulsus pudor;  
vindicta levis est quam ferunt purae manus.  
incumbe in iras teque languentem excita  
penitusque veteres pectore ex imo impetus  
violentus hauri. quidquid admissum est adhuc,  
pietas vocetur. hoc age et faxis sciant  
quam levia fuerint quamque vulgaris notae  
quae commodavi scelera. prolusit dolor  
per ista noster: quid manus poterant rudes  
audere magnum? quid puellaris furor?  
Medea nunc sum; crevit ingenium malis.  
iuvat, iuvat rapuisse fraternum caput,  
artus iuvat secuisse et arcano patrem  
spoliasse sacro, iuvat in exitium senis  
armasse natas. quaere materiam, dolor:  
ad omne facinus non rudem dextram afferes.  
quo te igitur, ira, mittis, aut quae perfido  
intendis hosti tela? nescio quid ferox  
decrevit animus intus et nondum sibi  
audet fateri. stulta properavi nimis:  
ex paclice utinam liberos hostis meus  
aliquos haberet - quidquid ex illo tuum est,  
Creusa peperit. placuit hoc poenae genus,  
meritoque placuit: ultimum, agnosco, scelus  
animo parandum est - liberi quondam mei,  
vos pro paternis sceleribus poenas date.  
cor pepulit horror, membra torpescunt gelu  
pectusque tremuit. ira discessit loco  
materque tota coniuge expulsa redit.  
egone ut meorum liberum ac prolis meae  
fundam cruentem? melius, a, demens furor!  
incognitum istud facinus ac dirum nefas  
a me quoque absit; quod scelus miseri luent?  
scelus est Iason genitor et maius scelus  
Medea mater - occidant, non sunt mei;

pereant, mei sunt. crimine et culpa carent,  
sunt innocentes: fateor, et frater fuit.  
quid, anime, titubas? ora quid lacrimae rigant  
variamque nunc huc ira, nunc illuc amor  
diducit? anceps aestus incertam rapit;  
ut saeva rapidi bella cum venti gerunt,  
utrimque fluctus maria discordes agunt  
dubiumque fervet pelagus, haut aliter meum  
cor fluctuatur: ira pietatem fugat  
iramque pietas - cede pietati, dolor.  
huc, cara proles, unicum afflictæ domus  
solamen, huc vos ferte et infusos mihi  
coniungite artus. habeat incolumes pater,  
dum et mater habeat - urguit exilium ac fuga:  
iam iam meo rapientur avulsi e sinu,  
flentes, gementes osculis - pereant patri,  
periere matri. rursus increscit dolor  
et fervet odium, repetit invitam manum  
antiqua Erinys - ira, qua ducis, sequor.  
utinam superbae turba Tantalidos meo  
exisset utero bisque septenos parens  
natos tulisse! sterilis in poenas fui -  
fratri patrique quod sat est, peperi duos.

[Furia et umbra Absyrti Medeae fratris cum fascibus.]

quonam ista tendit turba Furiarum impotens?  
quem quaerit aut quo flammeos ictus parat,  
aut cui cruentas agmen infernum faces  
intentat? ingens anguis excusso sonat  
tortus flagello. quem trabe infesta petit  
Megaera? - cuius umbra dispersis venit  
incerta membris? frater est, poenas petit -  
dabimus, sed omnes. fige luminibus faces,  
lania, perure, pectus en Furiis patet.  
discedere a me, frater, ultrices deas  
manesque ad imos ire securas iube:  
mihi me relinque et utere hac, frater, manu  
quae strinxitensem - victima manes tuos  
placamus ista. quid repens affert sonus?  
parantur arma meque in exitium petunt.  
excelsa nostræ tecta concendam domus  
caede incohata. perge tu mecum comes.  
tuum quoque ipsa corpus hinc mecum aveham.  
nunc hoc age, anime: non in occulto tibi est  
perdenda virtus; approba populo manum.

[Medea abit.]

Scaena III.

[Iason, armiferi.]

Iason:

quicumque regum cladibus fidus doles,  
concurre, ut ipsam sceleris auctorem horridi  
capiamus. huc, huc, fortis armiferi cohors,  
conferte tela, vertite ex imo domum.

[Medea cum filiis super tectum domi, Iason, armiferi]

Medea:

iam iam recepi sceptra germanum patrem,  
spoliumque Colchi pecudis auratae tenent;  
rediere regna, rapta virginitas redit.  
o placida tandem numina, o festum diem,  
o nuptiale! vade, perfectum est scelus;  
vindicta nondum: perage, dum faciunt manus.  
quid nunc moraris, anime? quid dubitas potens?  
iam cecidit ira? paenitet facti, pudet.  
quid, misera, feci? misera? paeniteat licet,  
feci - voluptas magna me invitam subit,  
et ecce crescit. derat hoc unum mihi,  
spectator iste. nil adhuc facti reor:  
quidquid sine isto fecimus sceleris perit.

Iason:

en ipsa tecti parte praecipiti imminet.  
huc rapiat ignes aliquis, ut flammis cadat  
suis perusta.

Medea:

congere extremum tuis  
natis, Iason, funus ac tumulum strue:  
coniunx socerque iusta iam functis habent,  
a me sepulti; natus hic fatum tulit,  
hic te vidente dabitur exitio pari.

Iason:

per numen omne perque communes fugas  
torosque, quos non nostra violavit fides,  
iam parce nato. si quod est crimen, meum est:  
me dedo morti; noxiū macta caput.

Medea:

hac qua recusas, qua doles, ferrum exigam.  
i nunc, superbe, virginum thalamos pete,  
relinque matres.

Iason:  
unus est poenae satis.

Medea:  
si posset una caede satiari haec manus,  
nullam petisset. ut duos perimam, tamen  
nimium est dolori numerus angustus meo.  
in matre si quod pignus etiamnunc latet,  
scrutabor ense viscera et ferro extraham.

Iason:  
iam perage coeptum facinus, haut ultra precor,  
moramque saltem supplicis dona meis.

Medea:  
perfruere lento scelere, ne propera, dolor:  
meus dies est; tempore accepto utimur.

Iason:  
infesta, memet perime.

Medea:  
misereri iubes.  
bene est, peractum est. plura non habui, dolor,  
quae tibi litarem. lumina huc tumida alleva,  
ingrate Iason. coniugem agnoscis tuam?  
sic fugere soleo. patuit in caelum via:  
squamosa gemini colla serpentes iugo  
summissa praebent. recipe iam natos, parens;  
ego inter auras aliti curru vehar.

Iason:  
per alta vade spatia sublime aethere,  
testare nulos esse, qua veheris, deos.